

Che l'inse!



C.L.I.

Via B. Bosco 57/2, 16126, Genova
Tel. 010589145 – 3472107286 info@chelinse.org www.chelinse.org
C.F. 95169000106

STATUTO DE L'ASSOCIAÇION

Tìtolo I

Natua e finalità de l'Associaçion

Art. 1

L'è constitòia a-i sensci da lezze 7 dexembre 2000 n. 383 l'associaçion de promoçion sociale stæta denominâ "Che l'inse!", con sede in Via B. Bosco 57/2, Genova. L'Associaçion a l'è indipendente e a travaggia senza limiti de induâ.

Art. 2

L'associaçion a no l'à motivo de goagno e a va appreuvo solo che a de finalità culturale e sòccio-politiche.

Pe realizâ meglio e seu finalità, l'Associaçion, con inandiâ e seu attività, a porrà mette sciù chesesegge forma de collegamento e collaboraçion con di enti pùbrichi e/ò privæ che no séggian in contrasto co-a natua de l'Associaçion.

Art. 3

L'Associaçion, into rispetto de finalità stæte ciæie de sorvia, a l'inandia de attività de utilità sociale in organizzâ ògni menn-a de manifestaçion, a pagamento ascì, ch'a conscidera a pòsse contriboî a-o ripiggio do senso de appartenensa a-a comunità ligure, con dâ a mente in particulâ mòddo a-a diffuxon, l'avvardo, e a promoçion da lengua ligure.

Tìtolo II

I associæ

Art. 4

Tutte e personn-e fixiche ò giuridiche che condividdan e finalità de l'Associaçion végnan a-a condiçion de associou con l'accettaçion, da parte do Conseggio Direttivo, da domanda presentâ a-o mæximo Conseggio Direttivo, e co-o versamento da quòta associativa annoale determinâ da-o mæximo Conseggio Direttivo. I Associaæ compónn-an, con facultæ de vòto deliberativo, l'Assemblea. E personn-e giuridiche partècipan a-a vitta associativa pe mezo do seu rappresentante legale ò donca de personn-a delegâ da sto chî. A l'è escluza a temporaneità da partècipaçion a-a vitta associativa e a trasmiscibilitæ da condiçion de Associou.

Art. 5

Tutti i Associaæ, gh'è conosciuo driti pægi e dévan onoâ i mæximi òbblighi. In particolâ, tutti i Associaæ:

- peuan ese elezui a-e càreghe associative;
- gh'àn drito de vòto, pe délega ascì, inte l'Assemblea;
- gh'àn drito e dovei de compì i travaggi concordæ;
- gh'àn drito de recede da l'Associaçion;
- son tegnui a rispettâ o presente Statuto e a versâ a quòta associativa annoale.

Art. 6

L'Associou o perde tâ qualitæ pe caxon de:

- dimiscioin volontaie;
- mancou pagamento da quòta associativa annoale;
- mòrte;
- indegnità stæta deliberâ da-o Conseggio Direttivo, appreuvo a na contestaçion in contraditòio con l'Associou.

Tìtolo III

Disposiçioin econòmico-finansiaie

Art. 7

L'Associaçion a disponn-e de un fondo comun, constitoio da-i ben mòbili e immòbili indicæ inte l'Atto Constitutivo, ò da de successive delibere do Conseggio Direttivo. O patrimonio o poria ese incrementou da di ben mòbili e imòbili che zonzian a l'Associaçion pe quæseségge raxon e titolo, donaçioin, ereditæ e ligæ espressamente destinæ a-o crescio do mæximo patrimonio. O patrimonio o dovia esse amministrou con dâ a mente a-i critei prudensiaæ de reizgo, de mòddo da conservane o valò e otegnî un reo adeguou.

Art. 8

Pe-a realizaçion de finalitæ instituçionale l'Asociaçion a dispoñn-e de seguente intræ:

- o reo do patrimonio;
- i ùtili, proventi, réndite e ògni atra intrâ ch'a ven da-o svòlze e attivitæ instituçionale;
- e contribuçoin do Stato, di enti pùbbrichi e privæ ò de personn-e fixiche;
- e oblaçoin, i ligæ, e ereditæ, e donaçoin e ògni atra intrâ ch'a no segge espressamente destinâ a-o crescio do patrimonio;
- i guagni derivæ da-a cession de ben e servixi a-i Associaæ e a-i tersi, ascì a traverso de attivitæ econòmiche de natua commerciale, artixanale ò donca agricola, inandiaæ in mainéa aoxiliaia e suscidiaia, e a tutte e mainée finalizzæ a-a razonzimento de finalitæ instituçionale;
- e quòte associative annoale.

Inte nisciun caxo i guagni che végnan da-e attivitæ instituçionale peuan ese scompartii, manco inte de forme indirette, fra i Associaæ.

Art. 9

L'ezerciçio finansiaio o decore da-o 1° zenâ e a-o 31 dexembre de ògni anno. I bilansci son approvæ da l'Assemblea avanti di témini previsti da l'articolo 12 comma 1°, ch'o vegne appreuvo. L'eventuale avanso de gestion o doviâ ese reinvestiò a favô de attivitæ instituçionale previste da-o prezente Statuto.

Título IV

I òrgani de l'Asociaçion

Art. 10

I òrgani de l'Asociaçion en:

- l'Assemblea di Associaæ;
- o Conseggio Direttivo;
- o Prescidente;
- o Collegio di Revixoî di Conti.

Cappo I

L'Assemblea di Associaæ

Art. 11

L'à dirto de partecipâ a-i travaggi de l'Assemblea con drito de vòto tutti i Associaæ che séggian a pòsto co-o versamento da quòta associativa annoale.

L'Associou o peu delegâ un atro Associou a raprezentalo inte l'Assemblea. Ògni Associou o no peu raprezentâ ciù che doî Associaæ.

Art. 12

L'Assemblea a se riunisce in sede ordenaia pe approvâ, avanti do meize de ottobre de ògni anno, o

bilanso preventivo e pe approvâ, avanti do meize de arvî, o bilanso consuntivo.

Tocca a l'Assemblea eleze i membri do Conseggio Direttivo e o Colegio di Revixoi. L'Assemblea a se riunisce in sede straordenaia:

- pe deliberâ o deslêngoo de l'Associaçion e a devoluçion do patrimonio;
- pe modificâ l'atto costitutivo e o Statuto;
- pe approvâ o programma de attivitæ de l'Associaçion;
- quando l'è necessaio ò dunque quando ciù che o dexe pe çento di Associaæ ne fan domanda. Inta prima convocaçion l'Assemblea a l'è constitoia validamente co-a prezenza da meitæ di Associaæ a-o manco; inta segunda convocaçion no conta o nùmeo di prezenti.

A meno che no segge stabilio despægiamentè da-a magioransa di prezenti de l'Assemblea, ò da-o Statuto, l'Assemblea a delibera a magioransa di prezenti.

L'Assemblea a se riunisce appreuvo a-a convocaçion do Prescidente, a-a quæ deve ese alligou l'órdene do giorno. A convocaçion a vegne portâ a conscensa pe mezo de n'email, ò donca inta mainéa che a s'è deciza con l'Associou che o no gh'à a posibilitæ de riçeive e email.

Cappo II

O Conseggio Diretivo

Art. 13

O Conseggio Direttivo o l'è compòsto da çinque membri elezui tra i Associaæ de l'Assemblea. I membri do Conseggio Direttivo indùan in càrega pe trei anni e peuan ese reconfermæ. Inti caxi de dimiscioin, impedimento permanente, decadensa de un conseggê, l'Assemblea a prevede de ficco a sostitilo con un atro Associou, o quæ o l'arestià in càrega scinn-a a-a scadensa natuâ do Conseggio Diretivo. Maniman a vegnisse a manco a magioransa di conseggê, o Conseggio Diretivo intrego o saia consciderou decheito.

A fonçion de conseggê a peu prevedde un corispettivo adeguou a-o tempo dedicou a l'ativitæ, passa o rimborso de speize fæte, documentæ pe ben e aotorizæ, ò donca ratificæ, da-o Conseggio Direttivo. L'è o mæximo Conseggio Direttivo che o stabilisce i eventuali corispettivi da assegnâ a ògni conseggê, a segunda di caxi.

Art. 14

No se peu nomenâ comme membro do Conseggio Direttivo, e se o l'è nomenou o decazze, chi o s'atreuva inte condiçioin previste da l'art. 2382 do Còdice Çivile.

O decazze da-a càrega de conseggê chi, senza raxon giustificâ, o no l'intervegne pe træ vòtte consecutive a-e sciscioin de travaggio do Conseggio Direttivo, a-o quæ ghe tocca prononçiâ a decadensa, dòppo avei contestou pe scritto a l'interessou e caxoin da decixon. Maniman ina càozza de decadensa a l'interessa o Prescidente, a domanda a l'è rivòlta a-o Viçe Prescidente, che o l'ezerçitià i poei che in arreo tòccan a-o Prescidente.

I conseggê desguggiàn i seu dovei inte l'escluzivo interesse de l'Associaçion.

Art. 15

O Conseggio Direttivo o l'eleze tra i seu membri o Prescidente e o Viçe Prescidente. A-o Conseggio Direttivo ghe tocca l'ordenaia e straordenaia amministraçion, e o se riunisce tutte e vòtte che a-o Prescidente ghe pâ neçesaio.

O Conseggio Direttivo o detèrmina l'impòrto da quòta associativa anoale; o l'acheugge e domande de ammiscion di neuvi Associaæ; o delibera a perdia da qualitæ de Associou, quando se ne riscontre a

moroxità ò donca se ne diaciare l'indegnità.

O Conseggio Direttivo o predisponn-e o bilanso preventivo e o bilanso consuntivo, cossì comme o programma de attività de l'Associaçion, che dapeu o sottaponià a l'approvaçion de l'Assemblea. O Conseggio Direttivo o peu delegâ a-o Prescidente e funçioin che o veu.

Art. 16

O Conseggio Direttivo o se riunisce appreuvo a-a convocaçion do Prescidente, ch'a l'avvegne via e-mail, ò inte in'atra mainéa stabilia co-o conseggê che o no peu rìceive de e-mail. E sescioin do Conseggio Direttivo en vâlde se l'è prezente a maggioransa di conseggê.

O Prescidente o ghia i travaggi do Conseggio Direttivo, di quæ se ne fa di verbali, trascritti a cua de un conseggê nomenou a pòsta da-o Prescidente, e conservæ co-i documenti de l'Associaçion. I verbali do Conseggio Direttivo en scriti in lengua lìgure.

E deçioin do Conseggio Direttivo en piggia a maggioransa sencia, passa che o Conseggio o no stabilisce despægiaménte, e maniman l'intravegnisse ina situaçion de equilibrio, o l'è determinante o vòto do Prescidente.

Cappo III

O Prescidente

Art. 17

O Conseggio Direttivo o l'eleze fra i conseggê o Prescidente e o Viçe Prescidente, che indùan in càrega pe trei anni e peuan ese riconfermæ.

Se mai l'intravegnisse caxi de decadensa ò impedimento permanente do Prescidente, o Conseggio Direttivo o l'è convocou de ficco da-o Viçe Prescidente pe eleze un neuvo Prescidente, che o l'arestià in càrega scinn-a a-a scadensa natuâ do Conseggio Direttivo.

Art. 18

O Prescidente o l'à a raprezentansa legale de l'Associaçion inti confronti di tersci e in giudicio; o firma i atti e tutto quello che ghe veu pe inandiâ i daffæ deliberæ da-o Conseggio Direttivo. O Prescidente o dà a mente a-o bon andamento amministrativo de l'Associaçion; o cua l'osservansa do prezente Statuto, o ne promeuve a reforma, maniman a se rendesse neçessaia.

Tóccan a-o Prescidente tutti i poei che o Conseggio Direttivo o deliberià de assegnaghe. Se mai l'intravegnisse caxi de decadensa ò impedimento permanente do Prescidente, o Viçe Prescidente o piggia o seu pòsto scinn-a a l'eleçion de un neuvo Prescidente.

Cappo IV

O Collegio di Revixoi di Conti

Art. 19

O Collegio di Revixoi di Conti o l'è compòsto da trei membri effettivi e da doî suplenti, elezui da l'Assemblea di Associaæ, e che indùan in càrega pe trei anni e peuan ese riconfermæ. A-o manco un di membri effettivi o deve ese iscritto into Registro do quæ a-o "Decreto Legislativo 27 gennaio 1992, n.

88" e modificaçioin e integraçioin vegnue apreuvo. O Collegio di Revixoî di Conti o l'eleze o Prescidente fra i membri inscrite into Registro.

Art. 20

A-o Collegio di Revixoî di Conti ghe tocca, pe quanto compatibile co-a natua de l'Associaçion, tutti i còmpiti previsti pe-o Collegio Scindacale de societae pe açioin (S.p.a.) da l'art. 2403 e seguenti do Còdice Civile. In particulâ, o Collegio di Revixoî di Conti o contròlla l'andamento da gestion a-o fin de veificane l'aderensa a-e régole stabilie da-o Statuto e a-e vigenti dispoziçioin de lezze, esci ben do coretto tegno da contabilita e da corrispondensa do bilanso a-e rezoltanse di conti e de scrite contàbili. O Collegio di Revixoî di Conti o redixe in lengua lìgure ina relaçion alligâ a-i bilansci annuali; o veifica a conscistensa da cascia e a rexitensa di valoî e di tìtoli de proprietæ de l'Associaçion. I membri do Collegio di Revixoî di Conti porian inte tutti i momenti, individualmente ascì, procede a de ativita de ispeçion e contròllo.

Cappo V

Deslèngoo de l'Associaçion

Art. 21

O deslèngoo de l'Associaçion, propòsto da-o Conseggio Diretyivo, o l'è deliberou da l'Assemblea di Associae, co-a magioransa di trei quarti.

O patrimonio che o l'aresta dòppo da liquidaçion o saia devoluo a fin de pùbrica utilita, secondo quante disponia l'Assemblea inta seu ùrtima seccion.

Cappo VI

Dispoziçioin fina

Art. 22

O presente Statuto o l'è modificou, apreuvo a-a propòsta do Conseggio Direttivo, da l'Assemblea di Associae, co-a prezenza de a-o manco trei quarti di Associae e o vòto a favò da magioransa di prezenti.

Art. 23

Pe tutto quello che o no l'è contemplou into presente Statuto, se applican, in quanto poscibile, e dispoziçioin de lezze in vigò.